



**Litterae Societatis Iesv E Regno Sinarvm Annorum MDCX.  
& XI. Ad R. P. Clavdivm Aquauiuam eiusd. Societatis  
Præpositum Generalem**

**Trigault, Nicolas**

**Avgvstae Vindelicorvm, 1615**

De socijs in hac expeditione Christiana vniuersim.

---

[urn:nbn:de:hbz:466:1-68733](#)

le carnis frustulis, laceraretur, qua in carnificina quoad fieri posset parceretur vita. Hæc sententia ad Regem refertur, vt eam ex more in rem insolenti comprobaret. Is rescripsit eam pænam sibi etiam imparem tanto criminis vide ri; sed quia maiorem nullam inueniret, sibi arri dere. Itaque nocens innocentium sanguinem suo tamdiu luit, quamdiu toto in corpore locus aliquis vulneri patuit, inter mille frusta discerptus. Hæc breuiter præfari visum est, ne ne sciretur quo in statu res huius regni publica versaretur. Sed nunc ad ea quæ sunt instituti nostri propria, sermonem conuertamus.

## De socijs in hac expeditione Christianæ vniuersim.

Hoc de quo agimus, biennio numerauit societas nostra in hac expeditione Christianæ viginti, accersitis in numerum duobus, qui hoc ipso temporis cursu ad suorum laborum præmia euolarunt, de quibus suis locis. Reliqui duo deviginti constant è sacerdotibus Europæis undecim, & septem fratribus Patrum adjutoribus; hi sunt eorum Sinarum filij qui iamdudum Christianis sacris imbuti, in Macaensi, Portu Lusitanorum oppido degunt, iam nō religione solum, sed etiam cultu ac educatione magis Europei prope, quam Sinæ. Hi omnes in quinque, domici-

domicilia distributi (quanquam priore huius biennij anno erant quatuor dumtaxat) modicum fermentum, ingentem massam condire pergunt, & vt laboribus sufficerent, valetudine ferè usi sunt prosperâ. Verum animi vires non parum promouit Iubileum S. D. N. Papæ Pauli v. quod licet ferò, tandem tamen ad nos aliquando peruenit, speratosque, vt speramus, fecit fructus; maximè cùm in Superioris visitatione inciderit, qui sedes nostrorū omnes (quoniam è Xauceana sede, quæ prima nostros ingredientes excipit, in aulam Pequinensem, sedium nostrarum remotissimam, se conferebat) ex itinere visitauit. Id vt fuit nouum, ita gratum atque fructuosum. Cum enim bonæ memoriae P. Martheus Ricius (de cuius fælici transitu mox dicemus) necessariò in aula resideret, omnibusque idem præcesset, mutuo ferè litterarum commercio omnia gerebantur; nisi si quando extra ordinem visitatio institueretur. Cum itaque P. Nicolaus Longobardus, qui Xauceanæ sedi iam multos annos in magna temporum varietate præfuerat, in demortui locum suffectus esset, auditâ Patris morte substitutus, dum speratum ab socijs Macaënsibus de more subsidium exciperet, quod etsi fuit spe minus, & nostrorum paucitati reique familiaris inopiæ tam impar, vt sustentari omnino hæc expeditio non posse videatur; tamen vt discamus è diuina manu pen-

A 4 dere

dere, non solum viximus, & antiquum tenuimus, verū etiam animus fuit, ad templum perelegans in Nanquinensi Regia meditandum, & intra eundem annum perficiendum. Aucti etiam sumus sedē noua in habitatissimo vt fertur totius Imperij Sinensis emporio: nihil enim difficile est Domino mira facere, vt cum sacris litteris loquar, in multis vel in paucis. Sed hæc sigillatim infra suis locis.

Dominus itaque messis in hunc agrum suum tres hoc tempore nouos operarios euocauit. Hi fuere, P. Felicianus à Silua Lusitanus, qui biennio ferè ante desperatam valetudinem ad spem reducturus, in Macaënse Collegium superiorum authoritate concesserat, eaque confirmata (licet non inutilem ibi indigenis, qui è Lusitanorum consuetudine & commercio in nostra sacra transeunt, operam daret) ad intermissam tamen stationem veteranus iam tyronum ductor redibat. Tirones vero duo fuere, P. Emanuel Dias, etiam Lusitanus, qui totos se prem annos in eodem Collegio Theologiam professus, ita necessarius ibi iudicabatur, vt non nisi admotis machinis, hanc arcem expugnarit. Alter fuit P. Nicolaus Trigautius Belga qui hoc eodem anno ex India aduenerat. Hi tres cum in Xauceanam sedem ipso D. Thomæ totius Orientis Apostoli die festo peruenissent, excepti sunt solitis ac insolitis Patrum, qui ibi residencebant,

bant, officijs. P. Nicolaus Longobardus domo  
breui composita & P. Gaspari Ferreira commendata, relictoque illi socio Patre Emanuele  
Dias cum reliquis duobus in interiora regni iter  
arripiuit. Hoc iter paucis persequi hoc loco vi-  
sum, quoniam nullius est priuati domicilij, &  
habet nonnulla scitu vel necessaria, vel non in-  
iucunda.

Bene auspicato die, quo Magi stella duce  
solem inuenerunt, iter aggressi paucis post die-  
bus extremam Prouincia Cantonensis urbem  
Nan-hium nomine tenuerunt. Ibi magna facili-  
tate transmisso ponte, non sine numine, magi-  
stratum qui viatores eo in telonio explorant,  
diligentiam euaserunt. Hinc iter est terestre diei  
vnus, medius enim est mons præruptus inter  
duo fluminæ, quæ ex eo nascuntur qui olim na-  
tura inuius, factus est arte peruius; diffissis, vt  
olim Alpibus ab Annibale, ita hic rupibus, inter  
quas ea apparent præcipitia, quæ, licet tutis, via-  
toribus horrorem incutiant: Et tamen ita facile  
redditum est hoc iter, vt è sella gestatoria baiu-  
lorumque humeris nihil opus sit toto itinere  
descendere. In montis apice fanum est perele-  
gans illi extrectum qui hoc iter aperuit. Is fuit  
è Cantonensi Prouincia oriundus quidam,  
cum summum totius regni gereret magistra-  
tum, Colaum vocant, quod nomen antiquum  
regni propugnaculum sonat. In eo templo sta-

A s tua

tua illi erecta , ad eamque suffitus perpetuus,  
non cultu Numinis , sed beneficij memoria,  
constitutus est : Templi parietes & area varijs  
in beneficij laudem poëmatis marmori inscul-  
ptis exornatur.

Hunc morem Sinæ erga publicè bene me-  
ritos obseruant. Inde mox in eo ipso vertice  
porta est ingens Cantonensis & Chiamfinen-  
sis Prouinciarum limes.

De hoc monte , qui diei vnius iter habet, o-  
mitti non potest res memorabilis. Ex hac pro-  
uincia in reliquum orbem Sinicum,& vicissim,  
frequens est commercium. Itaque merces, quæ  
duorum nobilissimorum fluminum ora conti-  
nuò euomunt , baiulorum humeris hinc inde  
transmittuntur , quorum numerus supra tria  
millia esse perhibetur ; præter iumenta , quibus  
etiam onera conuehuntur, hæ merces hospitio-  
rum dominis commendatae , tanta fide trans-  
mittuntur, vt eò tota fides Sinica , quæ reliquo  
regno rara est, conuolasse videatur. Transmissio  
monte denuò nauigare aggressi , flumen ingre-  
diuntur, quod initio angustum ac vadousum , in  
eam deinde magnitudinem excrescit vt Filij  
maris meritò nomen inuenerit. Initio dixi va-  
dousum , hyeme potissimum , quo tempore con-  
tra qua in in Europa, maxima est siccitas. Itaque  
eo tempore multa nauigia scopulo & vadis illi-  
sa dissentiunt , nec vñquam ferè nauigatur sine  
obuijs

obuijs naufragiorum tabulis. Socios diuina bonitas non leui periculo, cum ad scopulum allissent, liberauit, & Nan-cham, alteram nostrorum sedem, indeque Nanquinum secundo flumine cursuque deportauit. Vnde superior Pequinum cū uno socio in columnes peruenere.

Hactenus in hac nouella Ecclesia baptisimi forma ijs in casibus, quibus necessitas Ecclesiæ ritus, sacerdotalesq; manus non admittit, vulgo vrebantur Neophyti latina, Sinicis Characteribus expressa. Id habebat periculi non parum, nam Sinarum Characteres longè ab Europæis distant, neque enim illa habent elementa, ut in os, quibus aliarum linguarum sonos scribendo effingant. Immo sunt apud nos tres omnino consonantes. B. D. R. quæ apud Sinas nullum omnino habent usum, nec ullo è suis Characteribus effungi possunt. Itaque pro his sonus aliquis quam minimè remotus est reponendus. Sonum dixi nam consonantes ipsi vocales que nostras omnino non norunt (tot enim sunt apud eos hieroglyphici characteres, quot sunt res rerumque dictiones) habent tamen sonos nostris vocalibus aut consonantibus, licet non omnibus, respondentes. Præterea nusquam duas consonantes, nulla vocali media, norunt. Immo exceptis M. & N. nulla alia consonante terminant dictiōnēm, sed omnes in vocalem desinunt. Ex his facile videtur licet non paucos, ad paucas

paucas illas Baptismi formæ dictiones scriben-  
das, characteres tota lingua Sinica deesse, ac ne-  
cessariò maximè vicinos alios sonos assumi:  
quod et si non eam videbatur adferre varieta-  
tem, quæ formam irritam redderet; tamen in re  
tanti momenti securissimum est omnino secu-  
rius. Potissimum cum longe grauius ad hæc ac-  
cederet, quod illi ipsi Sinici Charakteres varie-  
varijs in locis efferuntur, & in quibusdam ita di-  
uersi sunt soni, vt nihil commune habeant. Ita-  
que periculum erat, ne aliquibi latinam formam  
Sinice scriptam ipsa vix latinitas agnosceret,  
tanto animarum periculo. Denique ut hæc o-  
mnia nihil obstarent, peregrinos, & quos non  
intelligebant, sonos prope nulli fideliter me-  
moriæ poterant commendare. Itaque in Neo-  
phytorum sæpe oculis, qui tamen rei Christia-  
næ bene periti erant, Catechumeni formæ igno-  
ratione, sine baptismo decessabant, magno v-  
trimque iusti doloris sensu. Huic malo itum ob-  
uiam sublatis quibusdam quæ obstare videban-  
tur, factumque vt quam vnaquæque gens suo  
idiomate baptismi formam habet, ea quoque  
Sinensis Ecclesia non careret; qua nunc vel pueri  
possunt salutaribus aquis eluere morientes:  
quod salutare institutum annalibus dignum mihi  
visum est, ne nesciretur à posteris, quo potis-  
simum tempore fuerit hoc in morem inductū.  
Affero denique hic vnum, quod vt scio la-  
tissimum

tissimum fore, ita in huius capitinis finem consul-  
tò reseruaui. scilicet videri nunc nobis omnibus,  
nostrorum in hoc regno perpetuam statio-  
nem extra periculum esse; quam, vt speramus,  
nulla quantumvis aspera persecutio excutiet:  
nam faciliùs Sinæ nos in perpetuum coniicient  
carcerem, aut extremo supplicio afficiant; quam  
adduci se sinant, vt nostros, iam intimè rerum  
suarum consciens, è regno ejciant: qua enim ex  
causa illi aduenas intra fines suos non admit-  
tunt; eadem semel ingressos retinent. Id maxi-  
mè patet è multis Mahometanorum millibus,  
qui in celeberrimis emporijs non impunè so-  
lum degunt, sed neque à litterarijs honorum  
gradibus, neque à Republicæ muneribus exclu-  
duntur; tametsi sint aduenæ, eorumque posteri,  
qui ab occidente in hoc Regnum irruentes, il-  
lud sibi quondam subiecere. Lex quoque est ab  
Sinis lata, quæ hodieque obseruatur ea in vrbe,  
quæ Mahometanos ab occasu negotiatores ex-  
cipit, in Xensi prouincia finibus (qua in vrbe  
Fr. noster Benedictus de Goës Lusitanus, qui ex  
India Cataium lustraturus venerat annis supe-  
rioribus diem suum obiit) ea inquam in vrbe lex  
est, vt si quis aduena nouem annorum spatio il-  
lius urbis incola fuerit, ad suos redire ne permit-  
tatur. In causa verò nostra sæpe hoc patuit, sed  
anno potissimum 1612. quo contigit nostros  
Nauseana sede pelli, non tamen ad suos, sed  
ad re-

ad regni interiora liberos dimitti, vt illius anni annales referent.

## De rei Christianæ statu in vniuersum.

Sapientissimus naturæ auctor ut tenuibus sensim incrementis rerum omnium erexit ætates, ita in ijs quoque, quæ supra naturam Diuinus fauor euehit, facere videtur. Itaque dum huius expeditionis Christianæ initia lego, & intueor præsentia, videtur mihi non immerito huius Ecclesiæ status ad obitum vsque P. Matthei Ricij, qui hunc fætum obstetricatus est, & tenerrimè educauit, infantia posse appellari. Ex eo iam tempore pueritiam ingredi, & sensim adolescere dici potest; vnde non abs re erit, paullisper in hoc velut duarum ætatum discrimine, nonnihil cum præteritis præsentia conferendo, breuiter ostendere, quid hactenus perfectum sit, in eorum maximè gratiam, ad quos superiorum annorum litteræ, quas audio non semel defuisse, minimè peruererunt. Id breuissimè faciam, nam hoc ipso quoque anno nauigat P. Matthei Ricij historia, quam ille italicō sermone paucis ante obitum mensibus, velut futurorum præfigus, ad hæc vsque tempora iam inde à suis initijs concinnauit. In hunc etiam locum congeram ea, quæ non sine nota omitti, nec sine fastidio possunt in singulis sedibus legi: ea solùm singulis